

٢٩- (لَا يُحِبُّ اللَّهُ الْجَهْرَ بِالسُّوءِ مِنَ الْقَوْلِ إِلَّا مَنْ ظَلَمَ) يعني

إيه الجهر بالسوء ؟ إزاي أطبق الجهر بالسوء لما أتظلم ؟

لما بنتظلم وبنوصل لمرحله من الألم بتشوف إن أقل حاجه إنني

(أنفس) عن إللي جوايا .. أفضل ما أنفجر !

والرد إللي بترضي بيه نفسك (إلا من ظلم)!

أيوه مسموح لك تنفس .. وده قمة الرحمة ..

لكن تنفس إزاي ؟

ده علشان تعرفه محتاجين نفهم يعني إيه (الجهر بالسوء) ..

إيه هو السوء المسموح بالجهر بيه ؟

السوء هو الفعل السيئ إللي قام به الظالم .. فمسموح بالجهر

به وسرد دقيق للحدث من المظلوم من غير غيبه أو أي إضافات،

والحكمه من الحديث فيه ميكنش لمجرد الحكايات والفضفضه في

المطلق ..

وإيه السوء في إني أحكي في المطلق لمجرد الفضفضه ، طالما

مراعي وملتزم في الحكي بدون تجاوزات ؟؟

الفكره إنك تحكي إللي حصل .. ده يعتبر سوء أصلاً !

أيوماً سوء لأنها أفعال تسيئ لصاحبها وتشوه صورته مهما كان
.. حتى لو هي دي حقيقته ولو هو إللي عمل ده في نفسه بإختياره!
ربنا وضع لنا قوانين نمشي عليها ومفيش قانون يتعارض مع
قانون ..

(وَيْلٌ لِّكُلِّ هُمَزَةٍ لُّمَزَةٍ) قانون

(وَقُولُوا لِلنَّاسِ حُسْنًا) قانون

(وَقُولُوا قَوْلًا سَدِيدًا) قانون

فمينفعش كونك مظلوم و مسمو حلك بالجهر بالسوء .. إن ده
يتعارض مع قوانين المعاملات إللي ربنا وضعها ..

هو مش الهدف إنك تعيش مظلوم مكبوت !

لكن في مخارج مسموح بها ومناسبه جداً لتكوينك البشري
وهتوصلك لسبل السلام :

أولاً : هتجهر بمشكلاتك لحكمة رد المظلمه أو تحذير من ظالم
أوإستشاره ..

ثانياً : القصاص بقنواته الشرعيه والقانونيه (وَلَكُمْ فِي
الْقِصَاصِ حَيَاةٌ يَا أُولِي الْأَلْبَابِ)

ثالثاً: الصبر (وَاسْتَعِينُوا بِالصَّبْرِ وَالصَّلَاةِ وَإِنَّهَا لَكَبِيرَةٌ إِلَّا عَلَى الْخَاشِعِينَ)

رابعاً: العفو عند المقدرة..

الفكره إن المنهج إللي ربنا وضعه هو أقصر طريق لسلامك
النفسي ..

وشعورك بالسلام ميمنعش إنك تعيش مشاعرك البشريه من
الحزن والألم ناتج لشعورك بالظلم ..

لكن فرق كبير إنك تتظلم ونفسك مطمئنه ومُتَّبِعٌ لِمَنْ هَجَى
اللَّهُ، عن إنك تتظلم ونفسك غير مطمئنه

